

09 APR 1997

Zaharah-Ekspo

USAHA PAMER KEJAYAAN NEGARA DALAM BIDANG EKONOMI SEPANJANG LIMA DEKAD

KUALA LUMPUR, 9 April (Bernama) -- Pergerakan Wanita UMNO akan menganjurkan Ekspo Pencapaian Ekonomi Bumiputera khusus bagi mempamerkan usaha dan kejayaan negara dalam pertumbuhan ekonomi sepanjang lima dekad yang lalu.

Ketuanya Datuk Dr Siti Zaharah Sulaiman hari ini berkata ekspu itu yang akan berlangsung selama 12 hari bermula 16 April ini juga sebagai kemuncak kepada sambutan ulang tahun ke-50 UMNO.

"Lebih 100 syarikat dari 11 sektor ekonomi akan mengambil bahagian dengan penekanan terhadap penyertaan dari sektor penggerak utama ekonomi negara," katanya kepada pemberita dalam satu sidang berita di sini.

"Ia akan menonjolkan pencapaian bumiputera meliputi semua bidang industri serta mengimbas kembali pencapaian politik dan ekonomi negara sejak 50 tahun yang lalu," katanya.

Katanya, rakaman peristiwa sejarah dalam usaha memertabatkan sektor ekonomi dan perdagangan negara akan turut dipaparkan melalui sebuah 'time tunnel' yang dijangka mendapat sambutan daripada ramai.

Menurutnya, antara sektor utama ekonomi yang akan turut mengambil bahagian ialah sektor perladangan, perkapalan dan maritim, petroleum, penerbangan, pembangunan lebuhraya dan pendidikan, telekomunikasi, kewangan, hartanah dan pengangkutan darat.

Zaharah berkata perasmian ekspu itu dijangka akan dilakukan oleh Perdana Menteri Datuk Seri Dr Mahathir Mohamad, dijangka turut hadir dalam upacara tersebut ialah menteri kabinet dan anggota Majlis Tertinggi UMNO. Ekspo tersebut akan dibuka kepada orang ramai mulai 17 April.

Ketika diminta mengulas mengenai jangkakan kenaikan harga ubat-ubatan, Zaharah yang juga Timbalan Menteri Kesihatan berkata, kajian sedang dilakukan dan kementerian masih menunggu laporan terperinci mengenainya.

Zaharah turut menafikan dakwaan kononnya beliau menghadapi masalah terutama dalam mengadakan aktiviti dan kurang mendapat sambutan serta penyertaan ahli.

"Saya tidak menghadapi sebarang masalah dan tidak timbul langsung soal "mengasingkan" mana-mana ahli dalam aktiviti yang dijalankan oleh pergerakan," katanya. -- BERNAMA

WNZ RI